

SONATON ARO BRENOLLA (Dakmesokani)

Dr. Julius L.R. Marak

SONATON ARO BRENOLLA

(Dakmesokani)

By
Dr. Julius L.R. Marak
Ph.D.

2003

Published by—

**Dr. Julius L.R. Marak, *Ph.D.*
Village Rongjeng-Anepa
P.O. Rongjeng-794 110
East Garo Hills (Meghalaya)**

**Chapa ka.chenggipa, 2003
500 Copies**

**Copy right reserved
Dr. Julius L.R. Marak, *M.A. Ph.D.***

Rs. 45/-

SEGIMIN KATTA BICHONGRANG

	<i>Jak.</i>	
	<i>Janapani</i>	<i>i</i>
1	Dakmesokanio bak ra.giparang	1
2	Sonaton aro Brenolla	2
3	Dakmesokani—I	3-41

JANAPANI

Sonaton aro Brenolla

Sonaton Aro Brenollani dakmesokani chasing gitalni katta ja.pang ong.a. A.chikrang dingtang dingtang dakmesokanirangko dake chasing gitchamo an.tangtangni maniani salrango kusi ong.e iandakgipa rokomari dakmesokanirangko dakrongachim. Indiba jensalo A.chik a.songona chasing gitalo rokom rokom nianirang, daka rikanirang, jekai T.V., Cinema ba gipin nia nikanirang gipbaha, A.chikrangni dakmesokanirang komiroroangaha. Da.o ia chasongode dongjasrangaha ine aganoba mamungba gualani dongja maina iandakgipa dakmesokanirango bak ra.na gita mandrangko sandion man.jaha. Sonaton aro Brenollani ka sagrikani aro uamangni golpo chasing gitalo janggi tangna tikelaniko mesokanisan ong.aigija A.chik nokdangko rakiangna agan mesokaniba ong.a. Ia dakmesokani sulko ba ring.aniko Serejing ba Boel sulrangchi ring.na man.a.

Ia ki.tapko chapa ka.na chu.ongjaoba dakchakaniko on.anina Arts and Culture Departmentko mitela.

Sonaton aro Brenollani ki.tapko poraie nie nambatatani cholrangko agan skidape on.atgenchim ong.ode, anga uarangko changgipin nipiltaiani somoio namdapatna kusi ong.begen.

Dr. Julius L.R. Marak.

M.A., Ph.D.

1

DAKMESOKANIO BAK RA.GIPARANG

SILJENG MARAK	:	Brenolla Momin-ni Pagipa.
DIKJE MOMIN	:	Brenolla Momin-ni Ma.gipa.
BRENOL' A MOMIN	:	Siljeng aro Dikjeni demechik.
DINENDRO MARAK	:	Songni pante, Sonaton Sangmani ripeng
GUNALI MOMIN	:	Brenolla Momin-ni nogipa.
SADU OR SOINASI	:	Dinendro Marakni jakpako nie agangipa Soinasi.
RAJENG ARENGH	:	Chitti sualgipa.
MANJENG MOMIN	:	Brenolla Momin-ni Adatang.
GOJING MOMIN	:	Brenolla Momin-ni Adatang.
MIKDAL ARENGH	:	Sonaton Sangmani Pagipa.
RAWANE K.SANGMA	:	Sonaton Sangmani Ma.gipa.
RAMDING SANGMA	:	Sonaton -ni Mamatang.
SONGNI ME.APARANG.		



2

SONATON ARO BRENOLLA

AGANSOANI BA SALAM.

1. Skang chasong mande gitcham, Atchu Ambirangni, Katta ian mingsingenga, ong.ja uamangni. Da.o gital chasongnisa, ia kattarangde, Sonatonming Brenollani, ja.pang chu.gimikde.
2. Skangonin A.chikranga, namen ma.siachim, Rokom rokom ring.e sale, rona changparachim. Ku.skijok Atchu Ambi, ia ring.arangko, Unonisa ring.jok saljok, Gonda Serejingko.
3. A.song chiga A.chik A.song, Dura-Imbamani, Ma.ko Dikje Pako Siljeng, minga Brenollani. A.chik a.song bijatchio, Nokrek Medan donga, Abong Noga Silme Doka, unon songdongana.
4. Umang namen man.e cha.a, aro rike tua, A.chik ma.gitchamrang umang, chasong mingsingpa.a. Brenollani Ma.a Paa, namen man.e cha.a, Chimongachim hajal gamko, ua badingenba.
5. Da.o kamko mesokanggen, uamangni nokdangko, Brenollani Sonatonko, jora ra.aniko. A.gilsako nokdang rikna, badi neng.na nanga, Chakchikachi bon.kam.ao, kusiniko man.a.



3

DAKMESOKANI—I

MESOKANI—I

BRENOLLA SARA.O SAKSAN MI RAME RUMAL SIKA.

(Roamangjok Dinen Pante, gisik an.saoatnok,
Brenollani kamko nike, ua sing.paengjok.
Brenollade sing.eana,gisik namnikjajok,
Mamungkoba chanchigija, uko a.rikatjok.
Dinendroba re.bapiljok, sara asonggija, Changsao
nang.ko nikgen ine, una ku.chingbaha).

Brenolla— Ia angni rumal kingsao, maia pulkon siknok,
Nitojaoba golap pulkon, anga sikaignok. A.ia biji
achak na.a, jako bu.e kala, Agreode pe.tongenba,
wal.o so.e gala.

(Dinendro re.bara)

Dinendro— Maikosa sarao saksan, asonge sikenga,
An.tangnama sanabasa, na.a sikatpa.enga.?

Brenolla— Jenaba ong.bo na.ra, maina sing.paenga, Maina
saksan re.baenba, maiko bel.belenga? Ama Apa
noko dongja, a.bachi re.angjok, Saksan rona
kra.ama, ta.rak re.angbojok.

Dinendro— Angni sing.anio maiba, nang.na krajama, Achak gita katangchi:na, a.rikbebeama? Nang.mung rona ine anga, da.o mangsongbaja, Knitomo rim.e dokgen, anga mande namja.

Brenolla— Anga saksan mi ramenga, re.ba maina angchi, Jinmaarang re.angtokjok, a.ba kamtangtangchi. Kratba cha.ja na.ra saksan, am.roroe rona, Kra.ama pante mande,arang grio rona.

Dinendro— (Ka.a nange) Romaljama somoiode, me.tra aro pante, Sing.maljama kamko niko, maiko daka ine. Noko mande dongja.oba, ka.sine watatbo, lanpako kema nang.ko, na.a ma.sirikbo.

MESOKANI—II

SONATON CHIGATCHI AUNA RE.BARA

(Ka.o nangjok Dinen Marak, da.nang pante saksan, Ka.tingoba chakchikaha, ua gisik nama. Ua Pante ramram ong.ja, bida man.begipa, College matchotman.paesa, ua re.bagipa. Sikar ka.e re.bapiljok, Pante Sonatonba, Matburingko grongja.e, man.ja mangsamangba)

Sonaton— Attam ausrange re.nok, mijal aujaha, Be.enrangba sengpil.jok, buiring roangenba. Angni ganna chola longpen, aro kopinggipok, Su.na nanggen da.al salde, jawan nidikpil.nok.

Brenolla— Man.barama mijaloe, buiring roangara? Ia gitan re.bagenkon, anga nisopa.ra. Nang.ni re.angani ja.man, dada Mejengbani, Sokbajokchim ru.utgijan, ja.ku jitangaoni.

Sonaton— Manja anga mijalode, rasong dongpajajok, Na.song noko asongange, matkon wasrapajajok. He da.ode gualbajok, ba.ra kingsakode, Da.on ta.rak ra.ekuna, gando patsakode.

(Brenolla ba.ra su.soa)

Brenolla— Da.on anga su.sokuna, Panten ba.rarangko, Sokbahaode on.jawaha, ka.o nanggen angko.

Sonaton— Maina su.sopa.jok na.ra, jawan ba.rarangko, Mande ska nikdikode, agan on.gen nang.pao. Ka.sapa.e da.al dipet, daknabe indake, Songba nokba kna.ode, rotokgen mitake..

Brenolla— Ripeng na.ra sana kenna, dongja angna agre, Nang.ni angna ka.sapa.ode, chame chu.ongake. Skangonin chame nang.na, anga ka.sarachim, Paraksrangna gisikoa, anga ka.sokjachim.

(Rumal on.ate)

Ripeng angni ka.saan chimik, gisik ka.sinjrimjrim, Chiring dare ba.ra su.ram, chipang ka.teng jrimjrim.

Sonaton— Aiao! Brenol sona na.a, maiko chanchipa.jok, Choligija pantenara, maina ka.sapajok? A.gilsako angna bate, pante silgiparang, Leka pora bida buti, namen man.giparang. Donga nang.na kraagipa, gisik seng.giparang, Gun rasong gnanggipa, man.e cha.giparang.

Brenolla— Hajal bida man.genoba, da.nang an.tangnasa, Gisik seng.a man.e cha.a, urang magnasa. Bida buti dongpagija, kangkal cholgrioba, Jik Se ka.sagrikgenode, nokdang uamangsa. Kangkal cha.asigenoba, duk suk chakringipa, Plak kamon meligrike, apsan dongrimgipa. Gisik seng.a bida man.a, plak an.tangnasa, Uarangko angna nangja, ka.san gisikkosa. Bida buti dongpajaoba, Jik Se ka.sa.ode, Game cha.e nokdang daka, gisik kusi ong.e.

MESOKANI—III

BRENOLLA CHITTI SEA

(Sonatonba au miksuna, chigatchi re.angjok, Unomiting Brenollaba, chi ko.na re.angjok.

Sonatonni au miksue, re.angpil.mitingo, Brenollade
su.rikaha, uni ba.rarangko. Auram chikoramo
grongna, an.tang miksongako, Man.paaha
grongtaina, pil.e chidareo).

Gunali— (re,bara) Abi na.a maiko saksan, gisik chanchienga,
Kali kolom ra,bitenba, chitti senakenga ?

Brenolla— Agannabe Apamangna, chitti searangko, Chitti see
man.oara, gume insoaibo.

Gunali— Abi sana miksongesa, na.ra senakenga,? Aganpa.bo
ma.sipana, anga aganjawa. A.gilsako jora ripeng,
changsa ra.na nanggen, Jik Se kusi dongrimpana,
basenade nanggen.

Brenolla— Nono jripijrip dongaiku.bo, da.on ma.siaigen, Ang'
chittina nama ku.rang, ua on.paode.

MESOKANI—IV

SONATON

(Brenolla S. Momin da.nang, chitti senakenga, Sena
dako pa.jaenga, jakko salpilenga. Gisiktango
chanchigimin, ua dontongjawa, Seja.oba gisik
ka.tong, uko miksongenga)

Sonaton— Anga da.o re.na nangjok, Shillong songjinmaona,
Engineer kamko ka.na, chitti man.so.paha. Ia
kamrang bebe ong.e, angna on.paode, Mingsa
cholde ong.pagenchim, anga kangal pante. Atchia-
intal dukko chakka, da.oba matchotku.ja, Kusi
ong.e salsamangba, dongnan man.paku.ja. Apa Isol
ka.sachake, on.jok ia kamko, Janggi tanga
gimikona, cholko dakaniko. Ia kamo napahaode,
kakket ong.e ka.nok, Chua gadangona sokna, anga
jotton ka.nok.

(Brenolla Sonatonna chitti sea)

Angni ka.san janggin' ripeng, Sonaton K. Sangma,
Kan.dikgipa kattarangchi, nang.na seatenga. Anga
me.chik branggipa, duk'o man enggipa,

Nang.mung janggi tangrimpana,
 mol.molatpaenggipa. Angni bimang silpajaoba,
 na.a ka.sapa.ode, Kamna aratchenchimoba, cholon
 mikchapa.ode. A.gilsakni jora ripeng, gisik
 chanchiachim, A.sak janggi tangrimpa.na,
 nang.kon miksongachim. Kangalgipa me.chik bi.sa,
 mikgil kiratcha.e, Seatenga kingsa chitti, gisik
 dongtoja.e. Angni katta seanio, dukni donggenode,
 Ka.saon kema ka.pachina, pil.e mol.molate. Me.chik
 gisik donggijana, chame chanchipa.gen, Ka.san
 gisik parakata, Brenolla S. Momin. (Chitti semane)
 Chu.sokatjok Brenollaba, see ku.pakwatjok,
 Sonatonna chitti see, gisik parakatjok. Chanchienga
 seatangko, ong.genma ong.jawa, Semanoba on.nan
 pa.ja, ua ra.chakgenma? Jeba ong.bo semanaha,
 anga on.atsrangnok, Man.soenba ma.sichina,
 ka.saan parakatjok.

MESOKANI—V

DINENDRO CHITTI SENA CHANCHIA

(Dinen Marak gisiktango, da.nang kiratcha.jok,
 Brenollani chonnikana, namen gisik sajok. Dinen
 pante songjinmani, Doctor man.angpaha,
 Chonnikoba bida donge, kamko man.angpaha).

Dinendro— Me.chik badita gisik seng.a, nigen anga nang.ko,
 U.ikuja Brenollade, angni chanchiako. Chitti kingsa
 a.bachenge, seatchenge nigen, Chitti gita dakja.ode,
 seke katangsranggen.

(Chitti on.ea)

Rajeng— Dinen babu nang.na chitti, jako watatenga, Maiko
 seatpa.enggenchim, anga ma.sipaja.

Brenolla— Ia chitti ramram ong.ja, songjinma.ni Doctor,
 Chakchikange ka.angode, man.pagen Director.

(Brenolla chitti poraia)

Ka.saa angni jora ripeng, Brenolla S. Momin,
 Seatenga chitti kingsa, gisik chanchiatgen. Nang.ni

angko chonnikoba, anga gisik saja, Changsa
gualgenchimoba, maina chanchitaija. A.gilsako duk
suk chakna, darang jora ra.a, Hajal nomil
donggenoba, anga nang.kon sea. Nang.ni gisik
chanchipil.e, angchi an.pilbaode, Jora angna darang
dongja, momin nang.na agre. Angni ku.rang
on.anirang, nang.na nidikoba, Parakenga
miksongako, pante silpajaoba.

(Brenolla chanchie)

Dinen pante me.chiksuri, agre napsiksika, Songo
nomil silla bang.a, maina chitti seja. Indi gita
aganoba, mikgil kiratcha.ja, Hajal chitti segenoba,
anga sechakpa.ja. A.gilsako jora ripeng, janggi
tangrimpa.na, Darang me.chik basepa.a, paltang
miknapana. Me.chik suuri dake uni,
mikchasimmakoba, On.tisaba mikgisepchin,
niatpa.nan sikja.

MESOKANI—VI

DINENDRO SADUKO GRONGE JAKPA NIA

(Dinen babu kamko man.jok, re.chakatangpa.nok,
Tura songjinma.o donge, Doctor kamko ka.nok.
Rasonggiri pante da.nang, poraijok duko chake,
Patiaha nokgipaba, una ka.sachake)

Dinendro— Da.o anga kamko man.jok, re.genma re.jawa,
Doctor kamko ka.na re.na, songkon watnapjawa.
Doctor kamo dongepa.na, anga re.angode,
Brenollako man.jawaha, chanchia gitade.
Gisiktango chanchiachim, nanggen chu.soknade,
Watpiljawa chu.sokgija, re.angsranggen rime. Da.o
anga chitti kingsa, pil.e seataigen, Chitti gita
dakja.ode, so.otsrange galgen.

Sadu— Oh, babu na.a saksan, maiko chanchienga, Ia jolni
mande gita, nang.ko nikjaenga?

Dinendro— Oe ong.ja ia jolni, Nokrek Medanoni, A.chik
a.songoni ong.a, chinga skangoni. Angni Apa

A.chik mande, game cha.pagipa, Ama Apa
budepajok, songa dilpaenggipa.

Sadu— Nang.ni ka.sae on.pa.ode, jakpa nipagenchim,
Mikkang a.sel ong.gniko,nang.na agangenchim.
Babu nang.ni jakpa angna, nina on.pa.ode, Rasong
mikkim chu.gimikko, ma.sina skode.

Dinendro— Nang.ni ka.sae nipa.ode, anga maina kanggen,
On.panasa tangka dongja, maichi ku.pnikgen.
Cholgrioba ka.sachake, na.a kusiode, Mikkang
salchi ong.gniko, aganne on.paode.

Sadu— Ranga gamma donga nang.o, game cha.oni joka,
Nang.ni gisik namja.ode, signiba donga. Da.o
nang.ni miksonggipa, me.chikkode galbo, Nomil
nang.ni jora ong.ja, ma.siede ra.bo. Miksongako
chu.sokatna, drae dakgenode, Dal.a a.sel ong.gen
nang.ra, uko ma.sipabo.

Dinendro— Nambeaha gualako, na.a mikrakatjok, Ha paisa
anabriko, ka.sae ra.angpa.bo.

Sadu— Mitelbea babu nang.ko, re.nahane salani, Agannako
gisik ra.bo, dakpanabe ramram.

Dinendro— Salam Sadu choligija, bi.ame cha.gipa, Ong.ae
ong.jae aganenba, togie ra.gipa. Dontongjawa
miksonggimin, rongna gisiktango, Hajal nomil
rura.oba, watjawa Mominko.

(Manjeng Sonatonko Sikarna rimanga)

Manjeng— Da.al buring rona mosa, Me.sam am.e nina,
Nang.mung buring re.grongarok, pangna
re.paku.ja. Mijalode wasrapjajok, da.al re.taipa.gen,
Nang.ni rasong meliama, an.ching ma.sipa.gen.

Sonaton— Mosa da.alde ba.ra su.na, anga nengengku.a,
Shillong kamko man.e angko, umang okamenga.
Re.nakode basakoba, somoi apjokkal.ao, Indioba
kema ka.bo, ka.sae ianpako.

Manjeng— Ambin salo'su.na man.gen, somoi jarroode, Matko
man.o salam gita, rasong dongpa.ode. Mija Apa

ra.bataijok, guli barukkode, Chingonikon ra.jolaibo, chandal bolsakode.

Sonaton— Na.an ra.e re.bo mosa, rasong dongpaengoke, Re.nakani gisik ra.na, matburing man.baode.

MESOKANI—VII

(Brenolla ba.ra sika—Manjeng re.bara)

(Sonatonko Manjeng da.nang, sikarna rimangjok, Sangma pante ianchango, re.angna sikjajok. Indioba Manjeng pante, drae rimangtaijok, Sikar ka.na pa.sikari, uko donangjajok)

Brenolla— Anga me.chik chittikode, seede nibebejok, On.atna.an sani jako, ripeng man.jaengjok. Jeba ong.bo chame nang.ko, banoba nikode, Ripeng na.a saksan ong.e, re.ako man.ode. Pa.jaoba mikchimite, on.ataisrangnokchim, Kingsamangmang sechengako, unon ma.sinokchim.

Manjeng— Nono na.a knatimbo, Sonaton re.gnok, Uni songreangna skang, butiko dakbojok. Ru.utgijan re.angode, Shillong songjinmaona, Engineer kamko man.e, uni re.anga.ona.

Brenolla— Mama anga ma.sipaja, uni re.nakako, Re.angode gronggrikpa.na, dakgen mingsa cholko.

Manjeng— Da.o buring sikar ka.na, angmung baksa re.gen, Uni chola ba.rarangko, na.a su.na nanggen. Ru.utgija salon re.nok, name tariatbo, Intang attam ran.ahaode, ra.ange donebo.

Brenolla— Namgen mama indakode, anga su.soaigen, Happen chola ba.rarangko, anga tariatgen.

MESOKANI—VIII

Buring Roanga.

(Sonatonming Manjengbani, buring roangpa.jok, Matchok Matasimkon da.nang, umang man.bebejok. Matchok man.a ramram ong.ja, a.sim

ringgipasa, Pekchigni grong najok, matchok bipadotsa).

Sonaton— Aiwa boning name nibo, matchok re.baengjok, Na.a bolo gakatenba, jrip dongaibojok. Sala matchok joke katbo, da.alde ang jakoni, Man.akode watpiljawa, jokgen na.a bachi. (chandal goata) Chabo boning man.bebejok, dal.de re.grongdikjok, Bimasama bipasama, name ma.sijajok.

Manjeng— Bipa boning bima ong.ja, matchok matasimsa, Aiao namen dal.bebejok, a.sim ringgipasa.

Sonaton— Re.nok boning wa.a kabo, salba salniangjok, Intang soke raton teton, walba walaingnok.

Manjeng— Angni nang.ko rimbapa.ra, rasong dongbebejok, Re.nakani gisik ra.na, an.ching patipa.jok.

MESOKANI—IX

Brenolla aro Gunali.

(Manjeng da.nang nogipako, namen skiangjok, Uni kamko ka.sochina, Sonatonko mong.jok. U.ipaja Sonatonde, Manjengni gisikko, Nogipana buti dake, burying rimangako. Brenollade Sonatonni, ba.rako su.sojok, Chola longpen ba.ra su.e, tarie donsojok)

Brenolla— Nono na.a miko su.bo, aro menilkoba, Ran.ahaode su.soaibo, aro jahakoba.

Gunali— Abi na.a bachi re.gen, da.al salgimiko, Maiko dakna miksongesa, su.na on.a miko ?

Brenolla— Sangma babun ba.rarangko, anga su.ekuna, Mama suna agananga, intang ran.sojawa.

Gunali— Gumeara bachi re.na, ba.ra su.atenga, Bachi maina re.na ine, ua tarienga?

Brenolla— Nang gumede Shillong kamna, Engineer ong.e, Re.angenga ka.pak ka.pak, knal songko wate,. Ramao cha.angpachinasa, una su.atenga, Nang.ni ramenggipa menil, sakkin gatatpa.na.

Gunali— Anga ma.sijaesa abi, da.on su.aignok, Nang.ni jeko ge.etanga, anga chu.sokatgnok.

MESOKANI—X

Brenolla ba.ra su.a

(Brenollamung Gunalide, da.nang abisaba, Agangrikjok Sonatonni, plak kamrangkoba. Ba.ra su.na re.chakatjok, da.nang Brenollade, Miko chin.e ramsoaha, me.chik Gunalide. Mia rama ran.giminko, ua su.sopa.jok, Abitangni ge.etanga, nogipa ka.sojok. Brenollaba Sonatonni, ba.rako su.sojok, Gisiktango an.tangkoba, jikgipa dakatjok. A.gilsako gisik kusi, janggi tangrimpa.na, Sonatonko jora ripeng, nomil chanchienga).

Brenolla— Angni rasong gnangpa.e, man.pabebeode, Him gose inainokchim, gisik ka.tongode. Da.al gita jringjrotna, su.na man.paode, Chola longpen chinaniko,salsal rampanade. A.gilsakni an.sengara, aiao bon.chotnokchim. (Sonaton buringchini sokbara)

Sonaton— Sawa angni ba.rarangko, su.e donsopa.jok, Na.noanma namchikanma, ang'de ma.sijajok. (Ba.ra tem.e) Jeba ong.bo ka.saesa, angna su.sopa.jok, Su.giminko badi ingen, anga mitelainok.

Brenolla— Ia nangni chola aro, genji kingsakode, Gualatjok tem.chapatna, longpen pillokode.

Sonaton— Na.ra maina su.sopajok, sakgipin ba.rako, Mitchi mitchi sengbakkak, ba.ra suurirangko. Na.a an.tang gisiktangan, ba.rako su.jokma, Sakgipinni didiachi, kamko ka.pajokma? Ango dongja kangal pante, maiko on.atpagen, Nang.ni ba.ra su.anide, groko chotna nanggen.

Brenolla— Aiao, na.a Sangma babu, sakgipinko gita, Agan kal.akrame rojok, chametangja man.a. Ripeng ba.ra

su.na donga, angna u.iatbo, Songni ja.ku jitan salo,
chingo cha.angpa.bo.

Gunali— Abi aro Gume apsan, da.o dongtokenga,
Na.simangko rimechina, Apa watatenga.

Sonaton— Daa bal.eka nono bi.sa, jawa mitdakgnok,
Re.angboaha na.simanga, gipin nikdikgnok. Jawa
gipin nikeode, angko badi ingen, Bobil ginal bang.a
angna, gisik rakna nanggen.

Gunali— Tol.ja gume matcha chikgen, anga tol.chongmotja,
Bitchi rita donbaenga, re.nok minbaku.ja.

Sonaton— Re.soaibo abisa.an, intang re.angaigen,
Na.simangan sokkujawa, rama.on srapaigen.

Brenolla— Tol.panabe chame angna, re.bachongmotbone,
Chinga ka.sin re.sopa.na, jarobapana.be.

MESOKANI—XI

Sonaton aro Brenolla.

(Sonatonni ba.rarangko, Brenolla su.taijok,
Su.manemung ra.nahaowa, turamo donejok. Uko
nike Sangma babu, gisik jabrangpil.jok, Uni
chanchiengmittingon, Me.chik sokbataijok)

Sonaton— Kangal pante maiko daknok, chanchisokpiljaha,
Me.chik Brenollani gisik, watna miksongjaha.
Cholijaoba kamo donge, aldu mittangnasa.
Agilsako jora ra.e, songsal janggi tangna. Cholijaoba
maiko dakgen, me.chik watjahaode, Bia ka.e
rimangsranggen, chra de namnikode.

Brenolla— (Re.bara) Maisa sona re.bajajok, re.na aganate,
Bitchi rite donsopa.jok, nang.na bimung minge.

Sonaton— Maiba dake gitik gitak, be,en an.sengchangja, Re.na
inen tarijokchim, kema ka.pachina.

Brenolla— Tol.a chame bebera.ja, hai da.o re.bo, Mama angko
watatenga, nang.ko rimechina. Ka.sapae chame

angmung, apsan ja.ku jitbo, Damsan re.e
golpojolna, an.ching ka.saako.

MESOKANI—XII

Manjeng aro Gojing dongsoa.

(Sangma babu buti dake, changsa jokrikjokchim,
Togiatna man.jok ine,kusi ong.pajokchim. Indioba
Brenollade, nisoo niksojana, Rimesrangna
re.angaha, gisik dongtojana. Re.angenba
rimesrange, apsan re.bapil.jok, Sakgnian kusi
ong.e, nokchi sokbapil.jok)

Manjeng— Mijal mosa sokbajaha, kamrang bang.paenggen,
Nisobejok chinga nang.ko, mikkang gronge re.gen.
Re.ba boning asongebo, a.sak golpo ka.na, Bijak
mamung dongja.oba, miko cha.angpana.

Sonaton— Nangja mosa cha.baman.jok, okan okkrijajok,
Be.enrangba an.sengjaenga, changgipino cha.nok.

Brenolla— Aiao, Chame maikai dal.de, be.en an.sengjaenga,
An.ma jrimjrim sko sating, gisik dongtojaenga.
Buring bolgrim a.bimandu, do.kurang matku.rang,
Ka.dimeatgenma angko,knatoan ku.rang. Noko
rona aratbea, am.bol sotna re.gen, Mi sae cha.na
dongja, e.salkoba am.gen.

MESOKANI—XIII

Brenolla A.mbol sota.

(Brenollade gisiktango, chanchie dukko man.jok,
Mainaba namnikjakon, chaakon ringangjajok.
Am.bol sotna e.sal akna, ine pa.sikangjok, Dukko
ka.gualatpa.na, ua re.jolangjok)

Brenolla— Iarangkong sotaignok, bachi chel.e re.gen, Diltukal.e
re.angoba, buring bobil donggen. Mi bijak sae
cha.na, e.sal ake re.nok, E.sal re.ru namnamade,
chibasalchisa.nok. Chibasalchi kenomangba, draen
re.e nigen, Bitolsako akpanade, da.on man.baaigen.

(Mapbil chikna rikbaa)

Aiao, angna da.alsalde, maia a.sel ong.nok, Srimdimdim asongenba, maian nisoengjok. Oh, na.ra gipin ong.ja, Mapbil jadapasa, Angko nisie galna ine, rikbaenggipasa. Ang' janggiko da.al salde, na.an mangkimanok, Dakchakgipaarang dongja, amjao janggi galnok. Saoba angna ka.sachake, dakchakpa.genode, Gisik ra.pagenchim gose, janggi naljokode.

(Dinendro buring roange ku.rang kna.a)

Dinendro— Mai a.sel ong.gitikjok, pil.e da.alsalo, Dakchakchina ku.rang on.a, knaa nachikkolo. Da.o mangmang uagitan, anga re.baachim, Mamung buring jontukon, anga nikbajachim. Aiwa simdim nikataha, Mapbil jadapasa, Dakchakako am.enggipa, Sona Brenollasa. Nono bakbak angchi katba, angni janggilchina, Badi gita bilakmanchaa, anga tattenina. Nigen anga jadapako, chabaa sepangchina, Bobil dingna ka.dongode, chike nipachina. Matsrangipa ia Mil.am, anga sko sotgen, Da.al na.a panten jako, janggi galna nanggen. (Mapbil baksa dakgrika aro so.ote gala) An.tang janggi jama gale, nang.ko chelchakaha, Da.al intal chame angko, gisik ra.angboaha.

Brenolla— Ripeng maikai ka.gualgen, janggi jokatako, Janggi nisigipaoniko, naljokatgipako.

Dinendro— (Dilange) Hai chame anga dilna, nokchi re.pilboaha, Mikkang salchi gisik rakbo, buring bobil bang.a.

MESOKANI—XIV

Brenolla saa.

(Buring nisei bon.gnokchim, angni janggi jama, Dinen babu dakchakaha, buring roangenba. Brenollako noko soke, ua dilbaaha, Mikkangchina gisik ra.na, kamko dakangaha. Dinen babu gisiktango, namen ka.dongbejok, Signiko jokataha, ua ka.sanapjok. Brenollani gisikode, ka.saani dongja, Mikkangosa ka.samika, gisik ka.tong dongja)

Brenolla— Angni janggi unsalo, sichongmotgnokchim, Dinen babu jokatjaode, janggi gimanokchim.

Dinendro— Brenol na.a on.tisaba, saan namkaljaina, Anga samko on.angpa.na, na.a namnikgenma?

Brenolla— Ra.baenba kanataibo, janggi tanggenode, Angni be.en saengana, na.a ka.sapa.ode.

Dinendro— Gisik ra.bo Brenol na.a, janggi jokatako, Be.en bimang an.sengchina, pile ianchango. Changsao na.a ku.namgija, katta aganachim, A.jak sokna angni ong.ja, dukko ga.akgenchim.

Brenolla— Ia a.sel dukkonasa, na.a chingsojokma, Da.al angko inteknasa, dakchakna skama? Nono na.a ka.sinkal.e, angko jakkimdilbo, Angni turam a.damchina, soke dilpaku.bo.

Gunali— Hai abi ka.sinkal.e, re.bo jakkimdilna, Nang.ni turam a.damona, soke dile donna.

MESOKANI—XV

Sonaton aro Brenolla.

(Brenol nomil Mapbil chike, saa bilongbejok, Dinen babu samko on.e, una kanangpa.jok. Uandake Dinen pante, an.tang dakchakako, Aganangjok Brenollana, chasong gisik ra.bo).

Sonaton: Bibalrangni gisepode, golap nitobata, Me.trarangni gisepode, Brenol daknangbata. Similgipe gingsikpa.na, an.tang gintingtango, Sikbeoba man.ja uko, jite bangbango. Bibal nitogenchimoba, kenna bu.su bu.na, Ake nina sikbeoba, pa.ja mikkim chaana. Chijatchio balenggipa, Mongnal bibalrangba, An.saoata gisik dukko, da.nang uarangsia. Sako bilroroma.esa, do.reng gakasia, Dukko ka.dimeatgipa, me.chik Brenollasa.

Brenolla— Nitogipa pul bagano, balenggipa pulrang, Gitchak rimit nitoriri, ma.dimenggiparang. Chel.aode man.gen gita, uaranko rim.na, Re.angode bile kata, kene ang' jagringna.

- Sonaton— Nang.ni gisik chanchiana, a.sak dukko man.a, Dukko man.genoba gose, nanggenaha watna. Nokgipani rakiachi, an.seng dongpa.ode, Ka.dongsoa nikrimtaina, an.ching changsa.ode.
- Brenolla— Ka.saa janggin ripeng sona, ka.sabebeode, Mikkang bimang silgijana, na.a mikchapa.ode. A.gilsako jora ripeng, ka.dongpa.na gita, Bia ka.e re.angsrangbo, gisik ka.dimena.
- Sonaton— Bia ka.na gisiktango, da.o chanchiku.ja, Angni a.sak miksongarang, da.o chu.sokku.ja. Gisik ka.tong angna ka.saa, pangna dongkamode, Re.bapil.e hia ka.gen, kamo dongahaode. Dongkamaigen angri gisik, pangnan nang.ni jagring, Gisik ka.gualpajawa, dongkamaigen bimang. Na.aba angko nikja.oba, gisik gualnabe, A.sak ruragenchimoba, ka.gualpana.be. Gisik ka.tong chu.gimike, ka.sabebeode, Sengsoaibo ru.utjawa, kamko man.ahaode.
- Brenolla— Ka.satangko jaktuatna, anga kenchakenga, Man.giminko jakwatatna, da.o sikjaenga. Badi gita ru.utana, me.chik sengsopa.gen, A.sak dukko man.e anga, Segri dongsopa.gen.
- Sonaton— Jeba ong.bo plak kamrang, ja.manosa ong.gen, A.bachenge kamtangchide, re.angchengna nanggen. Uni gimin sona na.a, tom.tom dongsoaibo, Jawa gipin nikeode, mitdaknok an.chingko. An.ching katta golpoangna, hajal donggenoba, Katta ianon bon.atnaha, gisik ra.bo Sona.
- Brenolla— Ruragipa Susimema, chame gisik ra.na, Malamgipa do.kimena, me.apa aganna, Grangtangko jepjepari, mikoa do.aran, Dikdik an.ching ekgrikoba, jako rim.e salam.

MESOKANI—XVI

Dinendro saksan chanchia.

(Sonatonmung Brenollade, gronge agangrikjok,

A.gilsako jora ripeng, umang golpo ka.jok. Umang
apsan golpo ka.e, gisik an.sengenga, Me.tra panten
kusin salko, gisik ra.atenga)

Dinendro— Bibalrangni gisepode, golap mingsingbata,
A.gilsako jora ong.na, Brenolla krabata.
Ka.dongama pante na.a, ukon jora ra.na,
Mikboktoka plak panten, uni nitoana. Chijatchio
balenggipa, mongnal bibal gita, Dongpaenga nomil
da.nang,arang chanchigija. Gisik ka.tong
mikboktoka, ka.ding rorimpa.na, Balenggipa jobab
bibal, jong.guk bilbaa opna, Ka.a amja bila sokja,
me.tran daknangana. Plak panten seksektoka,
janggal tangrimpa.na, Rongdimate gimaatgen,
me.tran plak gunko. Gisik kusi jik kimenba,
rakkigen nokdangko. Dinen babu gisiktango,
an.tang chanchiako, Agangrike niatenga, mikkang
salchiniko.

MESOKANI—XVII

MANJENG ARO GOJING

(Gojing Manjeng mamasaba, nona se am.pa.e,
Chanchienga chu.sokatna, jatni dakbewalko ra.e.
Namchiktangni mikchatangko, sing.rok sandienba,
Chu.sokatnok ru.utgijan, pante naljokjana).

Manjeng— Jong nang.ni gisikoa, maiko chanchienga, Bia ka.e
donangjawa, maiko daknakenga ?

Gojing— Jeba ong.bo Brenollani, ku.sikko knana, Okamatbo
mama na.an; tale sing.roksrangna.

(Brenolako okama)

Brenolla— Mama maina okamata, anga re.baaha, Maiba katta
donggenode, ma.sie ra.angpana.

Gojing— Brenol nang.ni gisiktango, maiko chanchienga,
Sonatona nang.na da.o, maiko ku.rachaka? Do.si
do.rae donangpa.na, kusi ong.pagenna, Una plak
kattarangko, na.mang golpoama? Kakket

aganchakbo namchik, chinga kna.e ra.na, Mikkang
salchi namna gita, chinga kamko ka.na.

Brenolla— Mama anga na.simangna, maiko agampil.gen,
Aganoba na.simangsa, dukko man.chakaigen. Ua
da.o miksongjaenga, do.si do.raeangna, Kamo
donge re.bapile, do.si do.ragenna.

Gojing— Indakode nam.jawakon, do.siangna nanggen,
Do.siangna jechakode, nang.ko watchapatgen.
Namjawama indakede, angni chanchiara? Mama
na.ba aganpa.bo, maiko daknakenga? Ruragipa
Susime ina, pante ka.dongpa.na, Malamgipa
do.kime ina, a.sak tik dongna.

Manjeng— Jong maiko aganpa.gen, namgen nang.ni dakan,
Ja.manona kenchakani, dongja ua Kaman. Jeba
ong.bo miksongako, an.ching parakatna, Changsa
attam okamate, katta talgriksrangna.

Gojing— Knal attam Brenol na.a, pitta sakkin gatbo,
Tariman.o okamatbo, mosa Sonatonko.

MESOKANI—XVIII

Sonaton aro Brenolla

(Gojing Manjeng adasaba, nona se am.pana,
Chanchienga chu.sokatna, pante chel.angjana.
Jechakenba do.sigija, pante re.angode, Mamasade
chanchienga, namchiktangko chape)

Sonaton— Balwa bale bolni bijak, moa balip balip,
Ma.dimenga mongnal pulo, sonani me.pillip.
Grangtangko jepjepari, sandia bitchiko, Ope
katchapa.na ine, taria a.sako. A.brirangko
ka.sinatna, chiringni chibisik, Ta.sri ta.sri
jokangenga, sillang dake rong.grik. A.ni mittim
salni ja.dil, a.sakna teng.sue, A.song chiga
an.saoata, do.kuan mikoe. Miko do.raja, A.chik
mikkim rasong, Nang.ni bewal ja.rikpachong, jatni
dilgiparang.

Brenolla— Maikosa chanchienga, sakchi nigito, Gisik ka.tong
chikjrimjrimsa, sona dukko man.e.

- Sonaton— Na.a me.chik ma.sipa.ja, angni chanchiako, A.chik a.song niwilwale, una ka.pakakako.
- Brenolla— Angni ku.rang nang.na maiba, dukko on.ahaode, Ka.saon kema ka.pachina, angni gualode. Angni katta gualana, dukko man.bejokma, Chanchigija ku.rang gam.a, bebe ra.bejokma?
- Sonaton— Ka.dimebo ripeng na.a, ka.saan ku.rangrangna, Kenchaknabe ripeng angna, nang.ko watgalangna.
- Brenolla— Jeba ong.bo sona nang.ko, kema ka.na man.a, Nang.ko rimechina mama, angko watatenga.Hai re.bo dikdik na.a, nokchi ka.sapa.e, Mama Gojing sengsoenga, nang.ko nichaksoe.
- Sonaton— Anga kenna nang.ming re.na, jawa mitakaia, Aganana re.angoba, nang.nan etalaia. Jeba ong.bo kenna ingen, re.gen nang.mung baksa, Maina mancha miksongenba, angko aganata. (Re.anga)

MESOKANI—XIX

Dinendro chanchia.

(Dinen babu gisiktango, namen ka.o nangjok, Sonatonko ra.nakako, ua knasojok. Uni gimin Brenollani, bimangko kimitna, Miksongaha ua pante, nisie galsrangna).

- Dinendro— Ka.tongtango kamenggipa, ka.tongni wal.sare, Gisiktango jokenggipa, gisikni chidare. Da.mo bia Brenollani, challakiko nigen, Badi gita denggu daka, janggi nisiranggen. A.gilsako nikan palde, nikjaon nambatsranggen, Nitogipa Brenollani bimang kimitsranggen. Uni angko jora ra.na, agre jechak dakgen, Ia angni pistolchi, goe mangkimitgen. A.gilsako jora ripeng, Brenol Nomilsanma, Una bate nitobata, angna dongjawama? Jeba ong.bo changsa pil.sa, anga kema ka.e, Sing.e nigen Brenollako, ka.tong ka.guale.

MESOKANI—XX

Brenolla aro Sonaton sokanga.

(Sonatonko rimechina, Brenollako watjok, Nokoniko rime apsan, Brenolla re.angjok. Nikrikgipa manderangde, gisiko chanchijok, Jik Se ong.ahakon da.nang, apsan re.jok rojok. Brenollade man.angaha, Sonatonko rope, Mamatangni aganata, katako tol.ange).

- Manjeng— Mosa nang.ko sengsoenga, napbae asonge.bo, Nangming apsan golpo ka.na, dikdik ja.nengtakbo.
- Sonaton— Maina okamata mosa, maiba kam nangama, Maiko sing.na miksongesa, rimena watata? Aganaibo chanchiatang, ku.rang paraksrange, Knal salo re.genaha, gronggen ja.manchide.
- Gojing— Chingni miksongade boning, ja.ku jitna skang, Do.si do.rae watatsrangna, ka.dongsrangna mikkang. Do.sijaode rimangoba, chinga namnikaigen, Nang.ni kattao pangchakesa, chinga kamko ka.gen.
- Manjeng— Boning nang.ni do.sie ra.na, da.o miksongjaode, Watchapatna miksongenga, chingni gisikode. Ia chingni miksongako, namnikjaode jebo, Indioba kakket nika, chu.sokatangpa.bo.
- Sonaton— Ong.ja inja na.simangni, chanchiako jeja, Indioba jik kimpa.na, gisik chanchiku.ja. Kamchi anga re.angchenge, kamo dongechenge, Re.bapil.e bia ka.gen, na.mang jajrengna.be.
- Brenolla— Angni jako man.giminko, naljokatna sikja, Nang.ni katta ku.rachaka, anga ka.dongchakja.
- Sonaton— Ong.ja Brenol indakede, ka.dongbo kennabe, Kamo donge re.bapil.gen, na.a kenchakna.be.
- Brenolla— (grape) Chame angna ka.sapaode, do.sie re.angpa.bo, Ka.saon anga mol.molenga, knachakangpa.bo.

- Sonaton—** Sona dukko man.panabe, anga tol.angjaenga, Ekna galna miksongede, katta aganjaena. Jako kamko rim.akode, dikdik sengsoku.bo, Maikai an.ching janggi tanggen, na.a chanchi.pabo. Nang.ni angni namgrina, anga dakpaenga, Mikkang salchi janggi tangna, chanchisopaenga. Da.o nang.ko do.sie do.rae, kamchi re.angode, Sokangenba kamo dongna, angko on.jahaode. Jako kamgri donggenode, neng.a janggi tangna, A.ba game cha.pa.oba, salsal dukko man.a. Sakgipino nokkol nape, a.jak re.genoba, Chonnikainok manderangde, bidakode man.a. Uni gimin sona na.a, dukko man.a nangja, A.sak apan janggi tangna, Nokgipa on.genba.
- Gojing—** Atcha jeba ong.chinaha, ra.nok nang.ni katta, Chu.sokatbo ku.rachaka, ja.man re.baenba. Chingna na.a ka.saode, katta pe.panabe, SONGGIPINO donggenoba, seatbo chittide.
- Brenolla—** Tol.panabe chame na.a, gisiksan ong.grike, Nang.ni ka.sachakgiminko, a.sak gualnabe. Re.angenba ripeng na.a, kamo dongchengbo, Dukni sukni kattarangko, chitti seatpa.bo.
- Sonaton—** Sokangenba kamtango, dongna man.ahaode, Kenchaknabe sona angna, seatgen chitide. Uni gimin sona na.asa, name dongsoaibo, Re.bapile do.siegen, kakketsa ong.pabo.

MESOKANI—XXI

Dinendro sikar ka.a aro Brenollako gronga.

(Dinen babu sikar ka.e, Brenollako grongjok, Ong.gijako tol.draenba, uko den.na am.jok)

- Dinendro—** Atchae, nang.kon Sarengkiko, on.ti nanggnnokchim Nangahaode ta.a baksa, attam cha.panokchim. Ia mangsa do.pilgimko, goe nitaiku.na, Bolchonggrimo ba.enggipa, sepang re.angkuna. (Goata) Him bia nangbebejok, mangsa do.pilgimko, Am.angenba koleku.na, gona manggipinko.

Brenolla— Sawa na.ra maiko am.a, jako batdul ra.e Mande salni re.a gita, gisik mikasale.

Dinendro— Aiao, da.oba grongtaijok, me.tra Brenollako, Basakniban gisiktango, sandienga nang.ko. Gisik ra.bo jeko nang.na, aganna kattako, Knasojok Sonatonko, nang.ni rongnakako. Aganenga pile nang.na, nomil gisik pil.bo Katta gita dakjaode, dukko man.gen u.ibo.

Brenolla— Pante nang.mung basakoba, damsan golpojokma? A.gilsako jora ra.e, Jik Se janggitangna? Maia kattao pangchakesa, ka.mikkennatenga, Sonatonko rongnakani, angko ka.o nanga.

Dinendro— Noti me.chik denggu dake, ma.sija dakama? Angko kiratcha.atari, togie ronakama? Nang.ko ia biapoan, tong.gni sottongen, A.kin cha.e gimachina, dapgen a.kol cho.e.

Brenolla— Kema ka.bo ripeng angni, katta gualode, Me.chik mande chanchisokja, ku.rachakmanode. Uni gimin pante angko, kema ka.paibojok, Songo nomil silla bang.a, dingtang basebojok.

Dinendro— Indakode iachango nang.ko, kema ka.nok, Mikkang salchi tol.taiode, nang.ko so.otgnok. Me.chik na.a da.alonin, gisik rakangpa.bo, Panterangko toginade, name chanchichengbo.

MEKSOKANI—XXII

Sonaton aro Brenolla.

(Manjeng Gojing mamasaba, katta tik ka.jok, Re.bapile bia ka.na, Sonaton namnikjok).

Sonaton— Songo angni plak ripeng, ka.saa no jongko, Ka.pakoba wate re.nok, aman apan songko. Salam plak ripengrangna, dongrikbone na.mang, Na.simangko watangpa.na, ka.a suang suang.

Brenolla— Nang.ni angko watangana, ka.paka gisikchi, Ka.a suang mikchi jingjang, mikrononi mikchi. Jeba

ong.bo ka.pakoba, dikdik watangku.bo. Ia tangka
ritchasako, ra.e re.angpa.bo.

Sonaton— Isol ka.sae janggi tange, rakiangpaode, Ka.dongsoa
nikrimtaina, an.ching changsaode. Uni gimin
Brenol sona, tom.tom dongsoaibo, Re.bapile bia
ka.gen, tol.ja ka.dongsobo.

Manjeng— Dukko man.a nangja Mosa, na.a re.angaibo,
Sokangesa chitti sebo, da.o watangaibo.

Sonaton— A.sak janggi tangna am.e, chel.e re.na nanga,
A.songtango wate re.na, anga ka.pakman.a.

Brenolla— Mikchi rakja ka.a be.a, Sonako nirikna, Ka.sagimin
ripengkode, bano ka.gualna.

Gunali— Abi aro game na.mang, dukko man.a nangja,
Nokgipa.an dakchakaigen, unosan pangchakna.
Uni gimin gume na.a, name sokangpa.na,
Nokgipani rakkiode, man.gen grongtaina.

Gojing— Boning na.a re.angaibo, nangja ka.pakangna,
A.gilsako janggi tangna,nanggen jotton ka.na.
An.seng baljokpa.e na.a, sokangman.pahaode,
Man.gen ta.rak re.bapil.na, kamo dongahaode.

Sonaton— Nang.ni gisik chanchiana, anga kusi ong.a, Duk
man.oba kema ka.bo, nangjok da.o watna.

Brenolla— Mikchi rakja watangpa.na, angni ka.tong be.a,
Ka.san ka.tong ka.pakata, gose chametangna,

Sonaton— Ja.ku re.ja nang' bimangna, janggilatpa.kubo,
Re.napangja nang.ko niko, chanchie gisiko.

Brenolla— Ra.angpa.bo ka.san rumal, gisik ra.atpa.na, Mohor
su.e nang' ka.tongo, Jik Se ong.na gita.

MEKSOKANI—XXIII

Sonaton gario re.anga.

(Sangma babu Shillongona, wate re.angenga Songni
plak ripengrangko, gisik ra.angenga. Uri ka.saa

Brenollaba, noko grongrikjok, Tangka ritchasako on.e, da.nang watatpa.jok. Plak ma.drang maharirang, kusi mikchi ong.e, Ka.pak ka.pak Sonatonde, songtangko watange.)

Sonaton— Ka.gualna man.ja gose, angni ma.drangrangko, Gisik ra.e dukko man.nok, songjinmaona soko. Indioba maiko dakgen, dukko chakchenggok, Janggi tange dongpaode, ja.man kusi ong.nok.

MASOKANI—XXIV

Sonaton Shillongona Sokanga—Office-o rimchaksoa.

Jinma— Rimchaksoa chinga nang.ko, Shillong songjinmaona, Duk sukko chakrimpa.na, jatna kamko ka.na. Da.aloni chingko dilna, na.a jako ra.e Asongtangni-ni plak kamko, na.a chu.sokate. Shillong songjinma.o donga, an.seng baljokani, Ka.dongsoe sengsoenga, a.songna namgni.

Sonaton— Na.simangni rimchaksoa, gisik kusi ong.e, Jotton ka.gen chu.sokatna, apan bakrimpa.e Gisik chu.sokpaku.jawa, Anga kamko dilna, , Agan skie on.pachina, plakkon mol.mola. Angni kamko ka.anio, guala dongode, Nirikenba aganpa.bo, ong.nikpa.jaode. Shillong songjinma.o donge, kamko ka.e ninok, Kamko name ka.na gita, jotton ka.pagnok.

MASOKANI - XXV

Sonaton Brenollana Chitti sea (Shillong songni Engineer, dal.begipa dolrang Hajal Hajal leka pora, gisik seng.giparang Kusi ong.e mande ra.e, uko rimchaksojok Adamanti manderangna, agan mesokangjok).

Sonaton— Angni ka.saa janggin ripeng, Brenolla S. Momin, Kan.dikgipa chitti kingsa, seata sokarin. Angni biap Shillong jilla, salaramchipaksa, Dongna apchangketgenoba, Dongna dongtobea. lan

nokmong nitobea, gadanggniosa, Basakoba
 seatode, sokbaigen angona. Nokgipani dilbaachi,
 sokbaha an.senge, Shillong sonjinma.o donge, da.o
 kamko ka.e. Engineer dal.dalgipa, umang
 rimchaksoa, Ma.maanti nianirang, nina nitobea.
 Sokbachengo jajrengachim, bano donggen cha.gen,
 Gisik ka.tong kenan gapa, Sonatangna ka.paken.
 Angni brange dongaoniko, nokgipa chelchajok,
 Nokrik nokdak Engineer, Kamko a.bachengjok.
 Hajalbonga jaantian, angni dormaha, An.ching
 name dongengode, man.gen janggi tangna.
 Kan.dikgipa kattachisa, anga seatenga, Bon.kamao
 ka.sa.achi, salam on.atenga.

MASOKANI—XXVI

Brenolla chitti man.soa.

(Engineer babu ine, uko mingsingaha, Shillong
 jillao kamko ka.e, ua dongangaha. Sonatonni
 bimungkoba, bang.an knatoka, Sangma babu
 kamtango, a.sak niksengaha. A.chik jatni rasong
 mikkim, teng.e rakkiaha, Dal.dalgipa
 manderangba, uko namnikaha. Bilsa bonga Shillong
 jillao, ua kamko ka.jok, Uni ja.man a.songtangna,
 ua re.bapiljok. Brenollade chanchienga, basak
 grongtainok. Re.bapile ku.chakako, basak
 chu.sokatnok).

Brenolla—

Him angai sokangpa.jok, maming a.sel grian,
 Chanchiate kenchakachim, Sangma babu na.an,
 Pilsa gita chanchiate, kusi ong.chakachim, Nokrik
 nokdak Engineer, babu ong.angjokchim. Indioba
 angni gisik, gualnan amjaha, Chanchiman.a
 walantian, tusinappilgija. Jeba ong.bo Sangma
 babu, name dongpaenga. Knasoe kusi ong.a,
 gronggen anga changsa. Cha.na ringna sikja anga,
 gisik dukan gapa, Plakchiko chanchioba, nikna skan
 bata. Chanchienga rasong giri, anga me.chik bisa,
 Seatpana Shillongona, anga chitti kingsa.

MASOKANI—XXVII

Brenolla chitti sea.

Brenolla— Ka.sabea janggin ripeng, Sonaton K. Sangma, Kan.dikgipa Salam on.a, pil.e sona nang.na. Ka.saachi kattarangko, parakna skangba Dukni sukni kattarangko, ma.siatpaenga. Chanchiate duko man.a, anga salantian, Basak kusi sokbapa.gen, walon tusinapja. Walgimikko dikdiksana, mikgil rimuange, Niksoaia walni jumang, bimang mikgitile. Jumangchiba niksoenga, damsas asongako, Agittalba gisik ra.e, nang.mung golpoako. Ripeng na.de gualjokma, an.ching ka.saako, Chiring chisam ba.ra su.ram, mohor su.atako. Jeba ong.bo iarangde, chanchiani katta, Ripeng name dongangpa.bo, gisik parakata. Sena anga changpajane, searangba namja, Seanio gualode, kema ka.bo Sangma. Angni ka.san janggin ripeng, na.a knatimbo, Nang.ko nikna sikipilengjok, changsa re.bapabo. Salgi joljol choenggipa, boksogimgim aram, Bon.kamao ka.saachi, on.atenga Salam. Gualjawa ripeng nang.ko, gisik ka.sagimin, Ia chitti seatgipa, Brenolla S. Momin.

MASOKANI—XXVIII

Sonaton chitti man.soa.

(Brenolla S. Momin da.nang, chitti seatenga, An.tang plak duk sukko, see watatenga. Bang.e nangja Shillongona, Chitti sokangpa.jok, Man.soaha salsnion, poraie kusi ong.jok)

Chitti poraia— Maiko mancha seatade, Momin Brenollara Kulienba poraisrangna, u.israngna gita. Aiao ia chittiode, katta ga.suake, Batanggimin salrangkosa, chanchiatmanake. Ka.a suang mikchi jingjang, dakmana gisiko, Banon donga u.iangja, gose bimangtangkon. Barioni jobap pulba, bibal gitchak bala, Chitti sea kattarangda, miksonga.an dal.a.

U.isojoj sona nang.ni, plak chanchiako, Angko gisik ra.chinasa, seatjok chittiko Gisik ra.jok angni plak, dakguala kamko, Kenchakatna skang angni, ku.rachakbarako. Sonan chitti plak dukko, da.o paraktaijok. Okamate seatenga, an.ching bia ka.nok. Da.o anga maiko daknok, chuti ra.srangnokma, Da.o angni kamtangko, wate re.srangnokma?

MASOKANI—XXIX

Sonaton Manjengna chitti seata.

Sonaton— Angni ka.saa boning Manjeng, plak kattarangko, Seatenga parakate, angni miksongako. Katta jeko paraknaba, anga gisik pa.ja, A.songtangchi re.angpilna, anga chuti man.ja. Angni ka.saa plak ripeng, ma.drang maharirang, Gronge anga kusi ong.na, angni ska gngang. A.songtangchi re.angpile, sokangpil.genode, Soka salko u.iatgen, angko nisokande. Da.o jasa ja.man anga, jotton ka.e nigen, Chuti angna on.jaoba, drae re.angaigen Basak chutti man.genode, re.baa grongpa.na, Mikkang bimang niksopa.e, gisik kusi ong.na. Sena katta bang.genoba, da.al bon.atnaha, See u.iatenggipa, Sonaton K. Sangma.

MASOKANI—XXX

Manjeng Sonatonni Chittiko man.soa.

Manjeng— Mama chitti man.sopara, Sonaton K. Sangma, Uni sokbapil.an salko, an.ching nisengsona.

Gojing— Ra poraie nibo ang'gri, maiko seatpa.ra, Knaenba duk suk katta, plak ma.sipana.

Manjeng— (Chitti poraia) Sonatonba kamo donge, Kusi ong.paenga. Dikdiksana chuti ra.e, ua re.baenga. Songna nokna ka.pakate, ua seatenga, Kamko wate re.basrangna, ua chanchienga

- Gojing— Chutti ra.e re.baode, da.nang nampagnok, Uni angna ku.chakako, chu.sokatangpa.nok. Songtang noktangona re.bae, kusi ong.rimpana, Ma.drang mahariko gronge, pil.e katchapana.
- Manjeng— Oe mama katta kakket, bia ka.angpana, Ma.drang maharirang gimik, do.siao dongna. An.tang ku.rachakatangko, chu.sokatangpa.ode, Re.angchina Brenolaba, kamni a.damchina. Be.en bimang an.sengora, ja.man re.bapile, Man.taiaigen songo dongna, semung meligrike.
- Manjeng— Nambebegen chu.sokato, ang' gri ka.sapaode, Miksongako tale ra.na, uni sokbahaode.

MASOKANI—XXXI

Sonaton Sangma chuti ra.e re.bara.

(Sonaton K. Sangma da.nang, chuti ra.bapajok, A.songtangna sokbaenba, kusi ong.patokjok. Songtangona sokbaarin, ma.ko paako gronge, Songni nokni obostako, ua tale ra.e. Manjeng Gojing mamasaba, grongna re.angtokjok, Uni plak miksongako, tale ra.epajok. An.tang ku.rachakatangko, Sonaton pe.jaha, A.gilsako jora ripeng, chu.sokatangpa.aha).

Sonaton aro Brenolla.

- Sonaton— Hai sona salam ka.na, name dongpaengama, Skang nang.na ku.rachaka, chuti re.bapaenga. Songo jasa dongangenba, kamchi re.angpilgen Kamo donge gadang chuna, anga rake krenggen.
- Brenolla— Aiao Sona jasanasan, chutti ra.baiama? Nangni skang ku.rachaka, chu.sokatpagenma? Indi bilsi ru.utana, anga sengsoaha, Duk sukko chakrimpa.na, an.ching do.sipana.
- Sonaton— Sona nang.na ka.saenba, anga re.bapajok, Mama ada namnikode, an.ching chu.sokatnok. Jako kamtang dongpaenba, nokdang dakpa.oa. A.gilsako duk suk chake, jik se dongrimpa.na.

- Brenolla— Kakket ka.sa dongpaenba, Sona do.siode, Re.paaïnok nang.mung baksa, gisik dukko gale. Songo noko donggenoba, hajal ruragipa, Bobil ginal daktokaia, mechik gisik grina. Hajal dukko man.genoba, seeming paming donge, Katchapa.gen gisik apan, biapsano donge.
- Sonaton— Brenol Sona agrepile, gisik ma.ringnabe, Duk sukko chakrimnade, nanggen jik se ong.e. Kangal cha.asigenoba, jik se kusi ong.e Man.paaigen ka.dimena, ka.saa donggenode. Pante me.tra ka.sagrike, Katta chi.genoba, Ra.man dongmanahaode, ja.man ka.pilaia.
- Brenolla— Sona nokdang ge.sa ong.e, gise dokgrikoba, Ka.saon kema ka.grikpa.na, gualgrikgenoba. Angni katta gualenba, aganman.genoba, Ka.san ku.rang mol.molachi, pile mikrakatna.
- Sonaton— Plak katta ma.sipanok, kamrang chu.sokman.ao, Sona nang.ni ka.saako, niknok dea man.o. Jeba ong.bo plak katta, ja.man ma.siaïnok, A.gilsako jora ripeng, kamko chu.sokatnok.
- Brenolla— Mitelbea Sona nang.ko, mama aganpa.nok, Plak kamko chu.sokatna, chinga taripa.nok.

MASOKANI—XXXII

(Manjeng, Gojing mamsaba, Nona seko sing.na, Manchiangjok pagipana, u.iatsochina. Siljeng da.nang kusi ong.e, kobor on.atsojok, Demechikna chawareko, nokragatpagnok. Manchiata somoi gita, sing.na re.angaha, Niam gita sing.e sanne, da.nang man.bapaha)

- Siljeng— Dekje, da.al attamode an.chinonade boning Manjengma.ang re.bana am.engana, Cha Chinirangko, Gue panrangko tarie donsobo.
- Dikje— Baoniko tarie donsoatenga, na.a an.tangan Man.e on.bajaengode. Mamingan dongja.

- Siljeng— Ha, Ha, je dongako tarie on.ataibora. Ai Brenolla da.al attamo nong.ni mama Manjengma.ang re.bana am.engana. Uni gimin gue panrangko, cha chinirangko aro je dongako sandie Donsobo. Attamo mi cha.e re.angchina.
- Brenolla— Je dongakode gimikkon tarie mijalon donsoman.aha. Aro mittamrangkode manimangchiniko bi.e ra.ejok. Gimikan donga, Apa.
- Dikje— Gimikan dongode nama. Indiba, dongjaosa maiko On.gen kratcha.gen.
(Manjeng aro Gojing mamasa re.bara)
- Manjeng— Boning, nokon?
- Siljeng— Nokon, boning, re.babo.
- Gojing— Name dongtokpa.engama, Abi gumemangde? Mamung Koborrangkoba on.atja. Nango nangosa mosa boning am.aia.
- Biljeng— Namtokpa.enga, Dikje am.pok morarangko am.e Asongchina on.atbora. Boningman.gara mainaba miksongesa Re.batokengama ma indinsa robaaiama?
- Manjeng— Chingni re.ba.ani kattade dal.a. Chinga mamsade, Namchiktang Brenollao, Sonatonko mikchaa namnikenga Ine kna.ani giminsa aro ra.na dongna miksonge dakengama. Uko tale ra.nasa re.baenga. Brenollara na.simangna Mamung kattarangkoba aganjama? Sonaton da.o chutt Ra.e songona re.bapil.aha. Uni gimin, uni katta Namode sal tarikrangko tik ka.e bia ka.e on.atstrangna. Ma.gipa pagipachi re.nasa, mai katta ong.chongmota Kattarangko talnasa chinga mamasade re.baenga. De, Boning, Brenollako okamatbo, tale sing.e nistrangna.
- Siljeng— Baosa, chingnade an.tangni mikchaa namikakoba mamingkon aganja. Jripjripta Chingade ma.sija.Na.simangnara sawasa aganskajok?

- Gojing— Chingna aganeba, maidakesa ma.gipa pagipana mangmangba namchik Brenollara aganja.Jeba ong.china, Abi gumemangara, mandekode namnikaigenkonba.Sonatonde mande nama aro jako kamkba donga.Shillong songjinma.o nokrik nokdakani Engineer kamko ka.enga,
- Siljeng— Na.simangni namnikode, chingade namnikaigen. Jeba Chingko aldu mittangesa siatna nanga. Sing.e niaibo.Chingade kusi ong.aigen. Uni se paa ra.ani sal somoirangba ong.aha. Chinga buchuma budepade Sakon am.e nina mamatangrango aganatgnok inesa chanchie Mijal mnisalrangonin dongaiengjok. De Brenollako okamatbo, Dikje mamatangrang katta talna nangana.
- Dikje— Ai, Nrenolla, iachi re.ba.
- Brenolla— Oi, mainaba okamatama, Ama?
- Dikje— Re.ba, iachi.Nang.ni mamama.ang nang.o sing.na Nangani kattarang dongengana (Re.bae asongea).
- Manjeng— Namachik Brenolla, skango nang.ni chinga agana Gita, Sonatonara da.o bia ka.oa kusi ong.genma ba Maikoba nang.na aganna kattarang dongama? Aro mingsa, Na.simangara a.gilsakni gita Jik aro Se. ong.ahama Ong.kuja ? chingna tale aganbo aro kakketkon ku.rachakbo. Chinga uni ma.gipa, pagipachi re.ange je kattarangkoba Tale ra.egen aro tik ka.egen. Tol.nabe kakketkon ku.rachakbo ong.jaode, Nang.nan namjawa aro chingna dal.bea kratcha.ani ong.gen.
- Brenolla— Mama, chingni mikchaa ka.sagrika ru.utgenchim Ong.ba na.simangna agre Ama, apana aganna dongkuja, kema ka.pabo. Sonatonde ku.rachaka bia ka.e re.anggen aro ma.gipa Pagipachi kattarangko tale ra.echengna aganenga. Chinga Mamung namgija kamrangko ka.a dongkuja. Nambeaha mama da.o, na simamgni re.baa, nasimangna aganena anga Cholkon man.ja. Kema ka.bo mama

ada, angni simakjana. Maiko daknok ma.sisokjae, jrip donbokaiaha. Mijal attam Sonatonko, anga grongejok Attam chinga golpo ka.e namen kusi ong.jok. Sonatani gisiktango, angna ka.saani, On.tisaba dingtangu.ja, gisik chanchiani. Na.simangni namnipa.e, sing.e on.paode, Namnikachim bia ka.na, chinga ta.rakale.

Gojing— Iandake namako chanchiode, chingnaba nama aro Kusi ong.a. Indioba chingko mamung saloba kratcha.ataniko, ra.bapanabe. Knal attamo uni ma.gipa pagipani nokchi re.ange, Kattarangko sing.roke ta.rakale bia ka.e on.a tik ka.egen jedakode Sonatoni kamtangchi re.angpilna skang chu.sokatna man.gen.

Siljeng— De, je dongako nangni jinggipa, depanterangna Song.e channe on.atbo, bijak dongjoaba, cha.e re.angtokchina.

Dikje— Ang jongmang.ara bijak dongjaoba, cha.e re.angtokbo, Tariatmanaha.

Manjeng— Hai, ang gri Gojing, an.chingde cha.e re.naha. Boningara, mosa Mikdalmangna knal attamona aganne tik ka.atbo. (Mi cha.e re.anga)

MASOKANI—XXXIII

SONATONKO BRENOLLANA SE SING.A

(Sonatonko Brenollana, sing.na re.angtokjok, Kattarangko jera ra.e, umang man.batokjok Ma.gipade watna sikja, da.nang ka.pakenba, Mamatangrang draaha, kamko chu.sokatna. Mamatangrang mikkang salrang, namen chanchiaha, Mosa boning ku.mongani, songo dal.bataha).

Mikdal— Jojongma, da.al attamode an.chingona Mosa Gojingma.ang Re.bana am.engana, donga donggijako tarie donsobo.

- Rawane— Maina re.bana am.engana, uamangara?
- Mikdal— Che, Che , Maiko aganenga na.ara, nang.ni depante Sonatonko mosa Siljengni bi.sana uamangni mikchaa Namnikgrikako ma.sie sing.na re.banakengana. Nang.ni Mamamangkoba aganatokbo re.bachina.
- Rawane— Nokpantekon rikkuja, chidarekon salkuja, ma.na ganna Patsan patkuja, Pana gando kingsan ra.kuja, da.on Jik am.engjokna. Da.o rang.sande ra.na man.kujawa, Watkuja angade.
- Mikdal— Sona-ma na.ara maiko chanchie aganenga. Nang.ni watjawa, man.jawa inoba, Nangni depantean manijaode maiko dakgen. Re.bachina jekoba katta jera ra.grike nignok.

MASOKANI—XXXIV

SILJENG , DIKJE, GOJING ARO MANJENG RE.BARA.

- Siljeng— Mosa nokonma? Ba bachiba re.angtokama?
- Mikdal— Bachi re.angna, nokon asongetokbo. Sona-ma, am.pok Morarangko re.bae on.bora.
- Rawane— Asongetokbo.
- Dikje— Nangjawa na.a sari jeoba asongna man.aigen. Ha, Sari, Ia merong on.tisa ra.bara.
- Rawane— Maina ra.baengade, nangjawa ra.angpilaibo. (Plakan asongtoka)
- Gojing— Boning, da.al chingni re.baani ja.pangde, mikgil Sina kratcha.na nangoba, namchiktang bi.sarangni giminsa re.bae nienga. Je ong.oba, nang.ni sadu sade , mosa boning, jongska adatangrangnaba koborde on.atakonba. Re.bana nangnikgiparang dongjahama, boning?
- Mikdal— Gimikkon aganattoka, da.on re.bagen.On.tisa mosamangko sengsoe Nikuna. Ra namgen.

- Gojing— Maiko dakgen, awang, je kattarangbakoba da.on namenga Ja.man ja.wilode mahari dolgninan dal.bea kratcha.ani Ong.naba donga inesa talgrikna re.baenga. Namchiktang Brenolla aro Sonaton mikchaa ka.sagrikenga aro an.tangtangni Gisepode tik ong.grikaha inani giminsa talgrikna Re.baenga. Jedakode an.chingna ja.man ja.wilonaba namgen.
- Mikdal— Na.simangni chanchiaba namba, jong.Angni nangnikgipa mosa boningrangde Plakan sokbatokaha. (Manderang tom.batoka - Chaware sing.a)
- Mikdal— De, boning plakan sokbatokahaode je kattakoba a.bachengatboaha..
- Ramding— Re.bana nanggipa plakkan re.batokahama? ba saoba Dongkuengama? Re.batokaha
- Mikdal— Dongjaha boning, re.batokaha.
- Ramding— Atcha re.batokahaode. Mosa Siljengmangara mainaba Miksonge re.batokama? Chingna kattarangko talatchenge On.ode namgen.
- Siljeng— Chingni re.ba.ani ja.pangde ian..Kratcha.na jaksi chikna nangoba, angni demechik jong Sonaton baksa mikchaa ka.sagrikanirang aro an.tangtangnade jora ripengko dakna tik ka.grikman.ahani giminsa je kattarangkoba, mahari ma.drango tale ra.na ine re.baenga.
- Ramding— Kattarangko knarikahakonba?
- Jinma— Knarikaha.
- Ramding— (Sonatonko sing.a) Atcha, ang gri Sonaton, na.aba Mosa Siljengni agananga kattarangko knarikahakonba? Na.ara Siljengni bi.sa Brenollako ka.saa namnikgrike An.tangangnade tik ong.grikaha ine aganna. Uni gimin Nang.ko sing.na re.baengana. Ia kattarangara kakket Ong.bebeama, chingna kakketkon donugijan ku.rachakbo. Na.ara ra.na dongnan dakama ba kusi ong.nasa dakaiaama?

- Sonaton— Kakket ong.bebea, angade mikcha namniken ra.na kimnan daka, indiba da.o rang.sande bia ka.na man.jawa.
- Ramding— De, na.ade ra.na kimnan daka. Brenollani ku.sikonikoba Kna.e ra.na. Brenolla na.ara Sonatonko mikchaa Namnika inara kakket ong.bebema ba nang.ni mama, ada, Ma.a paa draani giminsa kene aganama? Sonatonara Nang.na maiko agana aro ku.rachaka? Kakketkon chingna da.o Ku.rachakbo.
- Brenolla— Awang, angade an.tangan mikchae namniken ra.na rongnan daka darangba draa dongja. Ua angna kamo Napna re.angna skangba re.bapile bia ka.e rimegen ine Ku.rachakanga. Uandaken da.o chutti ra.e re.baoba, Bia ka.na ku.rachaka aro chinga an.tangtangnade tik ka.manaha.Do.ra do.sie kamtangchi re.angpilgen ine angnade ku.racahaka.
- Ramding— Atcha, je ong.ba, ma.a ba.gipao Pa chi.gipao sing.e Nina. Rawane aro ang boning Mikdal, nang.ni depante Sonatonde, Brenollako mikchaa namnike an.tangtangnade Ra.na rongnan tik ka.manahana, na.simangara maiko Agana watgenma watja? Ma maiba kanga bil.ani donggenma Ba dongjawa? Je kattako da.on tale aganatbo.Durubolna nokbichongna Kanga bil.anirang dongama dongja ? Tale aganchakbo.
- Mikdal— Angade maiko agangen, ma.a ba.gipasa ma.sia. Kamo Napan da.o jasan ong.kuja, ma.na ganna patsan patkuja, Pana gando kingsan ra.kuja, da.on jik ra.na am.engahama? Da.o bikande chingade watna man.kujawa.Uni mama adarangde Mamingba Kanga bil.a dongja.
- Rawane— Budepani aganan kakket, da.o biked jikgipa ra.na Man.kujawa, ja.mano ra.nakode ra.china.
- Manjeng— Oe, mama aro mani na.simangni aganaba kakketan ong.a. Indibba, Amenan ba.a, Chamenan chi.a,

chinga Brenollani Mama adade, niotang obitede, jik dede ra.man dongmanoba An.tangni bil amode ma.na paana jongna grina dakchakanikoba Champengani dongjawa. Ma.na Pana dakchakanide uni bilni Ning.osa. Ra.man dongmanomangba dakchakna man.aigen.

Gojing— Mamani aganan kakket ong.chongmota, chinga mahari Ma.drangde uni bilni ning.o dakchakanikode mamungba Champengjawa. Indiba, chingni nangnikara da.on nammitingon Kamko chu.sokatoara an.ching plaknan nama aro kusini ong.a aro Da.o namittingon kamko chu.sokatna man.ode an.ching Maharinaba Nama aro ja.mano kratcha.aniko ra.bajawa. Malamgipa Do.kime, ruragipa Susime, chingade da.o Sonatonni chutti don.e kamtangchi re.angpilna skangan bia ka.e on.atna chachiani dongachim, unasa mol.molna re.baenga.

Rawane— Da.ode bia ka.na man.kujawa, ja.mano ra.na skode Ra.china.

Ramding— Ang gri Sonaton, na.ara maiko aganna. Na.ara da.on Bia ka.genma ba nang.ma nang.pani katta gitan ong.china Ingenma?

Sonaton— Angade, Apamangni aro na.simangni jeko aganna ukon Maniaigen.

Manjeng— Indake ong.genchim ong.ode, chingade namchiktang Brenollakode done re.angaignok. Aro bia ka.anokode na.simangni namnikan salo chu.sokate on.aignok.

Rawane— Bia ka.gijade donangna man.jawa aro noko rakijawa. na.simangsa bano dongangnaka donangbo.

Ramding— Atchaa, jeba ong.china, Sonaton na.ara, Brenollako uni mama adarangni donnangoara rakirikaigenma? Na.ara uni mama adana maiko ku.rachaka?

nang.ma nang.pa watjaoba angade ra.ai rongaignok
ine agangenma? Ba Ama Apani kattana agrede
ga.changbatna man.jawa ine agangenma?

Sonaton— Oe, anga guale kam man.mano chuti ra.e bia ka.e
Rimegen ine ku.rachaka aro uamangko
ka.dongataha. Indiba bia ka.gijade donangna
man.jawa. Ama, Apan watna sikkujacode, ma.a
ba.gipani Pa chi.gipani kosakode ga.changbatade
kamko ka.jawa. Jensalo, uamang watna kusi ong.a
unsalo anga ku.rachakatangko chu.sokatgen.

Ramding— Sonaton na.aba indakode me.chikni ma.a pako aro
uni mama adako indakede ka.dongatna nangja.
Knalo ra.gen donggen ong.oba chra dekosa ra.gen
ukode ma.sibo. Uni gimin Rewane, aro boning
Mikdal Sonatonko da.alo watgija dakna man.jawa.
Sonaton Ku.rachakatangko chu.sokatna nanggen.
Bia ka.mane ra.man dongmanomangba chol
ong.ode ma.a pako nirok sandinara man.aiku.gen.
Uni gimin kamtangchi re.angpilna skang, bia ka.e
re.angpilchina aro songsalo mahari ma.drang
ku.mong nangrimgrike dongani gimin chanchibo.

Mikdal— Sonatonni ska chingade maiko aganku.gen, watna
sikkujaoba dean manijahaode re.angna skang
kamko chu.sokataichinaha.

Jinma— De, namako chanchien dakaha, nambeaha. Chinga
plakan kusi ong.a aro songtangni bi.sa songtangko
dilna cholko man.taijok. Songtangni bi.sa skia
man.giparang songgipinchi tang.anggija
songtangan ga.akpil.ani gimin chinga songde
namen kusi ong.a.

Siljeng— Mitelba, angni plak mosa boning, chra dedrang,
sadu saderang aro me.aparang. Uamangko bia ka.e
on.ani sal tarik chinga ma.a pade mikkang antini
kolgrik sukurbar salo chanchienga.

Ramding— Jen saloba na.simangni choljokako nie re.angna
skang Bia ka.e on.atbo. Chingade namnikaigen.

- Rawane— (Depantena watna sikjae grapa - jinma re.angtoka)
- Sonaton— A.sak jora ra.anaba, da.o jajrengsoa, Brenollana ka.sanape, ku.rachaktimanga. Seko rongna skang me.chik, ka.sae dakgenoba, Ra.man rongmanahao.ba, mande ra.kugenma? Pil.sa gisik an.sengata, pil.sa jajrengsoa, Kimanode dukko chaknok, deko man.pahaoa. Man.a dipet chakchiktate, deko aldupa.inok, Ka.sae nirok sandiachi, ja.del bolchaatnok. Pile anga chanchisoa, song.e su.e on.gen, Dukni sukni salrangode, pangchakgrikna man.gen.

MASOKANI—XXXV

SONATON ARO BRENOLLA KO BIA KA.A

- (Brenollamung Sonatonko, do.ra do.sienga, Songgimikan sokbatoka, umang do.siaona. Mama ada ku.patijok, Brenol Sonatonko, Nokdang dake tom.toma.o, janggi tangantokbo. Nokdang ka.saa donggenosa, Jik Se meligrika, Ka.saon kema ka.grikosa, nokdang rikna man.a) Reverend Kamal re.bara - bia ka.a
- Jinma— Git ring.a aro gilja a.bachenga.
- Reverend— Sonaton, na.ara Brenolla Mominko kusi ong.en kangal cha.asioba, Mikgron kana ong.oba, sabisi napoba, ja.a kora jakkora Ong.oba, su.e song.e on.na amjaoba, janggi tanga Dipet siaona kingking aldumittanggenma?
- Sonatan— Oe, kusi ong.en ra.a aro aldumittanggen, Watjawa.
- Reverend— Brenolla, na.aba apsan dake Sonaton Sangmako, (Me.chikko kusi ong.en Kangal cha.asioba, nama namjan saloba, aldumittangna sing.a) Amjaoba, janggi tanga dipet siaona kingking bebegipa Jikgipa ong.na ku.rachakama ?
- Brenolla— Oe, kusi ong.en ra.a aro janggi tangrimna anga ku.rachaka.

Reverend— Na.simangko sakgipinrang dragija, an.tangsa Kusi ong.e ra.ama aro sia sijana kingking Jik aro Se Ka.sagrike meligrike aro mande ra.e janggi tanggenma?

Apsan— Oe,Janggi tangringen

Reverend— Indide, nasimang bia ka.na skode, nasimangni Jakrani jakko rim.grike, Isolni aro Mondolini mikkango ku.rachakbo. (me.asa aro me.chik jak rim.e jakstem pate ku.mikchetgrike bia ka.aniko matchotaha)

MASOKANI—XXXVI

SONATON ARO BRENOLLA KO BIA KA.MANO KAMTANGCHI RE.ANGPILA

Sonaton— Chuti ra.baa matchotaha, knal re.pilgnok, Biaptangchi re.angpile, kamo dongtaignok. Brenol na.a dongrikku.bo, nang.ma nang.pa baksa, Biaprangko Sandienba, ja.man rimetaina.

Brenolla— Dongrikjawa Sona anga, apsan re.painaka, Kamo dongo sawa nang.na, song.e channe on.a. Dikdik saksan donggenoba, sawa nirokpa.gen, Dukni sukni saloara, sao pangchakpa.gen.

Siljeng— Rimangaibo, da.o dipetde chingara rakenga, Gisepo tangka paisarangkosa watate dakchakataibo. Nokko jamkode na.simang nirokjaemung sawa nirok Sandigen. Na.simangan chingkode mikkimit ja.mejoate siat Bon.atna nanggen.

Dikje Re.angaibo, Ama songo noko dongoba ruragipa Pasagipa bang.bea. Gisepo re.bae chingko nirokeaibo. Chingni da.o amangijan salode, na.simangan Re.bae nirok sandiejaemung sawa nirokgen. Indiba, Chingni amenga dipet nang.ni segipa baksa donge Song.e channe on.e dongeku.bo.Chingna jajrengnabe.

Brenolla— Gualjawa Ama, Apa, anga re.angoba, A.sak anga
nirokjaemung, sawa nirokkuna, Ma.na Pana
ka.pakoba, dikdik wate re.nok, Be.en
an.sengengoara, ja.man re.bapil.nok.

(Sonaton Brenollako rime kamtangchi re.angpila
aro Buchuma budepako Uamang aldu mittange
siata)

Bon.aha.

□□□□□

